

ЛҮИМА СЭРИПОС

23 марта
2017 года
№6
(1144)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Л. Теткина в аҕарум хури

Ты хуриг Клавдия Лукачёва Настя аҕингэ ёт пбелым блы.
Тав урёҕныл 10-11 лбпсыг ловиньтэн.

Ты
номерт
ЛОВИНЬТЭН:

Округ кўщаюв
эрнэ нэпакт
хасхатас

2

Ялпың мāt
ўргалавет

4

Сāлы ўрнэ
мāхманув
кассыт

8-9

Соссаң мāхум
āньтныл
сāвсыр утыт
ёргысыт

12-13

Ўсың мāt
яныгман этпос
пўрлавес

16

ЛЯХХАЛЫТ

Округ кўщаюв эрнэ нэпакт хасхатас

Маньполь этпос хўрмит хоталэт Мокруг кўщай нэ Наталья Комарова ос ПАО «Газпром нефть» ма-вой маныл нōх-винэ компаният кўщай ваңын хум Александр Дыбаль ос акв вәрмалъ урыл потыртахтасыг, ос округ мирколт нэпакт хасхатасыг.

Ань тыт ма-вой ос газ мил маныл ищхипың утыл нōх-виңкве пат-вес. Ты ищхипың утыт мот хон мат воссыг ат ёвтавет, манки олнэ мавт варавет. Округувт хосат тагыл ма-вой ос газ маныл нōх-вие. Таимагыс йильпи утыт ань тыт арталаңкве патавет. Тыт ищхипың утыл ма-вой маныл нōх-винэ Центр щёпитаве

тах. Тамле утыл ма-вой нōх-виңкве кўстыр, молях ос сав олн тув холтуңкве ат эри.

Ты компания хосат тагыл тыт рўпиты. Та сыс округувт тан сав лёңх хот-щёпитасыт, колыт ўнттысыт, сосаң мирн нётэгыт ос мот сав эрнэ рўпата вәрэгыт. Щар савнув ма-вой тан Ханты-Мансийский районт нōх-выгыт. Ты



ляпат олнэ павлытын тан акваг нётэгыт.

Кўщай нэ сосаң махманув урыл ос лавыс. Ань Нижневартковский ос Сургутский районыгт сосаң мирыт олнэ-хўлнэ

наканыл ос ханищтап вәрмаляныл элалъ тотнэ магыс нётмилыл тах варавет. Тамле ты ёмас вәрмалъ урыл кўщаиг потыртахтасыг.

Николай МЕРОВ

Пищма хаснэ махум ёт рўпитэгыт


Общероссийский народный фронтыг рўпитан хотпат ёт ляххал тотнэ махум «Югра» РИЦ нампа колт хонтхатыгласыт. ОНФ колт савсыр тэлат тармыл пуңктотнэ кўщайт: Константин Терновой, Сергей Дубовец ос Евгений Печерица тув ёхталасыт.

Тан «Дорожная инспекция ОНФ/ Карта убитых дорог», «Формирование комфортной городской среды» ос «Интерактивная карта свалок» рущ латңыл намаим проектыт щирыл рўпитэгыт. Ань тэланыл хумус тот минэгыт, кўщайт ты овылтыт потыртасыт.

Ты проектыт мирн пуссын сака эрэгыт, ань касың ўст, павылт махум сыстам мат олункве таңхэгыт. Матыр хот-аги паңктаве ке, тан танки магсыланыл лёль вәрэгыт. Тувыл тованагт порсың ма хот-щёпитаве, ос тан мот ма паңктуңкве тўлтхатамыт. Та холыт махум лёль вәрнэ накыт хонтяныл ос кў-

щайтн латың элалъ кётэгыт. Общественный народный фронт нампа колт рўпитан махумн хонтым порсың мат урыл сунсавет, та ма кўщайтн латың кётэгыт. Тувыл ёмашакв ма вос хот-щёпитаве, уральтым тананыл оньцияныл. Оси-паттым лёль тэлат пуссын ищхипың утн хансым олэгыт, ань тананыл мўсхалыг хот-щёпитавет манос ати – ман манки уральтаңкве вёрмианўв.

Нан рущ латңыл намтым ты эрнэ проект хонтылын ке, тот ляххалыт пуссын хўлтает. Ты коныпал матыр йильпи лёль тэлат хот кәсалэгын ке,



С. Дубовец

Общественный народный фронтан латың кётэн.

Ань сав махум тан палтаныл лёль лёңхыт урыл хансэгыт. Тан кётум латңаныл тара ловиньтавет, хот маныр хонтаве ке, ищхипың утыт олнэ картан пөслыаныл. Туйт толнэ юи-палт яңк нятнэ, лўпта этпосыг сыс лёңхыт хот-щёпитаңкве кўщайтн лавэгыт. Ысытт олнэ махум коланыл пөхат ман ўсхулы лёңхыт туйтаныл ёмшакв ат сыстамтавет ке, тан ты урыл сав пищма

хансэгыт. Тувыл төва олнэ колыт пөхат порс атнэ хусапыт матахмат хотал таглэкв ўнлэгыт, порсыт нэмхотталъ ат тотавет. Тамле накыт хурин вос пөславет. Ань мирн кётым латңыт савыңпалэ пуссын ловиньтавет, уральтавет ос хот-щёпитавет.

2017 тал Россия янытыл ма-витўргалан талыг намтым олы. Махум ты овылтыт хот ул вос ёрувлэгыт, сыстам ма-витув вос ўргалэгыт.

Тамара ХАТАНЕВА

ЛЯХХАЛЫТ

Мā-вит ўргалан ос нāй харыгтан хōтпат касэгыт

Ты этпос 15-17 хōталыт Югорск ўст «Славим человека труда!» нампа касыл о́лыс, тот мā-вит ўргалан мāхум акван-атхатыгласыт, 23 хōтпа кассыт. Тāн пуссын Уральский округувныл тув ёхталасыт, мāн о́лнэ мāvныл ат элумхōлас тув ялсыт.

Югорск ўст мāхум «Газпромтрансгаз-Югорск» нампа предприятия кассыт. Мā-вит ўргалан хōтпаг хаништахтан агит-пыгыт ос тув вōвыглавёсыт. Каснэ мāхум янытлаңкве Россия Президент вāңын хōтпатэ Игорь Холманских ос округ кўщай нэ Наталья Комарова тув ялсыг.

Ты юи-пāлт Сургут ўст нāй харыгтан мāхум тах акван-атхатэгыт. Тāн ты этпос 23-24 хōталыгт касуңкве патэгыт. Та ўст рўпитан нāй харыгтан мāхум яныг коланыл олы, мāхум мўсхалыг касуңкве тот вёрмёгыт. Ты касылн Югорский ос Нижневартовский университетыгт ха-

ништахтын мāньлат хōтпат о́с вōвыглавет.

Округувт инспекторыг рўпитан кўщай Дмитрий Кузьменко лāвыс, мāн мāvт кārкамьг рўпитан хōтпат Югорск ўсн ос Сургут ўсн о́с вōввёсыт.

Соссаң мāхум «Славим человека труда!» нампа касылн о́с вōвыглавет. Сāлы манос хўл совныл сāvсыр пормасыт юнтнэ хōтпат, сāsныл сāvсыр хусапыт вārнэ мāхум ос ййвныл сāvсыр аныщарыт ёргын хōтпат тот касэгыт. Ты рўпата мāньщи, ханты ос ёрн мирыт пёс йис вārмалыныл элаль тотнэ мāгсыл вāрыглаве.

Людмила
АЛГАДЬЕВА

Туи ўщлахтын пора ты ёхты

Няврамыт тэланьл ёт рўпитан кўщайт округ мирколт акван-атхатыглāлсыт ос няврамыт туи ўщлахтын, пусмалтахтын вārмалит урыл потыртасыт. Сапрāнит Всеволод Кольцов, губернатор вāңын кўщай хум, ты тэлат о́вылтыт лāтың лāвыс. Округ янытыл мōт кўщайтн ищхйпың ут хосыт потрыт пуссын хўнтлувёсыт ос эрнэ торыг тāнки матыр ювле потыртасыт.

Всеволод Кольцов акван-атхатам мāхумн лāвыс, ань няврамыт ўщлахтын, пусмалтахтын колытн миннэ лёңханьл ос тот о́лнэ пораныл акваг уральтым о́ныщавет. Тот рўпитан хōтпат ань сāvсыр вārмалит тармыл акваёт пуңктотэгыт. Ты тэлат ань пуссын российский сākконытн хасвёсыт. Тāн кāсың

мāt вос вāвет ос тāнки мāнанылт о́лнэ ўщлахтын колыт акваг эмщакв вос щёпитыяныл.

Юграт кāсың тал няврамыт сāvмёгыт, таимāгыс ўщлахтын колыт элаль вос рўпитэгыт, тāнаныл лап-пантуңкве щар ат рōви. Тувьл тōва āгиришит-пыгришит туи сыс нэмхоттал мōт мāн ат ялантāлэгыт, туп тāнки о́лнэ ўсаныл,

Округ кўщай нэ Наталья Комарова сапрāни вāрыглас, сāvсыр кўщайт тув вōвыгласанэ. Тāн аква вārмалы урыл тот потыртасыт. Кўщай нэ лāвыс, ань тыт о́лнэ мирыт тāнки халанылт юртыңыщ о́лэгыт, халанылт сака вори ат тотэгыт.

Люль тэлат вāруңкве ул вос кащилтавет

Тувьл мōт тārвитың вārмалы ань осн-нэглис, āгит-пыгыт ищхйпың утыт сāvсыр тэлат урыл ловиньтэгыт ос люль хōтпат ёт тот вāйхатэгыт. Ты хōтпатн люль тэлат вāруңкве кащилтавет, тōва мōт хōн мāн хōнтлуңкве вōвавет. Сāv мāньлат хōтпат ты мāхумн агтэгыт ос мōт хōн мāн минуңкве воратэгыт.

Ты вārмалы урыл Россия Президент Владимир Путин яныг сапрāнит полицият рўпитан мāхумн потыртас. Ос тāнанылн лāвыс, ты ищхйпың утыт акваг вос уральтыяныл. Няврамыт ос мāньлат хōтпат мори капыртаңкве, люль вāруңкве тот ул вос кащилтавет. Мāн

округувт тамле рўпата ань о́с вāруңкве о́вылтавет.

Тāн люль накыт ну-пыл мāхманув ул вос суссыт, округувт ань сāvсыр фестивалит, хаништапыт ос ялпың хōталыт вāрыглавет. Наталья Комарова лāвыс, ань округувт «Многовековая Югра» нампа йильпи проект рўпиты. Ос сāv мōт рўпата тāн тыт вārёгыт. Няврамыт, мāньлат хōтпат сāvсыр люль тэлат вāруңкве ул вос кāсашасыт, тāн ётаньл акваг рўпитаңкве ос потыртаңкве эри. Тōнт тāн тувле ну-пыл сунсуңкве ат патэгыт ос ёмас хōтпаг аныгмёгыт.

Людмила ТЕТКИНА

щёс палаткаң лагерь щёпитаве, Нижневартовск ўст āгит-пыгыт смена щирьл рўпитан коныпал ўщлахтуңкве патэгыт. Тувьл щāрыщ вāтан 29 сōтыра 875 няврам тах ялэгыт».

Щанит-ащит тāнки о́лнэ пāvланылт няврамыт ёт рўпитан мāхумныл путёвка вос китыглэгыт. Ань ўщлахтын колыт наманыл пуссын образование ос мāньлат мāхум департамент лōпсёт хансым о́лэгыт. Матыр-āти ат вāнэ тэлат тот тāра-паттуңкв рōви. Ос ищхйпың ут хосыт анкета-нэпакыт хумус мўсхалыг хансуңкве эрёгыт, нāн кāсың школат вос потыртавён ос суссылтавён.

Тамара МЕРОВА

ЛЯХХАЛЫТ

Ялпың мāt ўргалавет

Ты этпос 15 хōталēt РИЦ «Югра» колт ляххал тотнэ мāхум акван-атыглавэсыт, потыр ялпың мāt овылтыт олыс, руц щирыл тох намайлвес: «Особо охраняемые территории в районах промышленного освоения недр».

Округ кўщай вāнын хум Алексей Забозлаев ос Дума депутат, ханты хум, Александр Новьюхов тән потыртасыг. Округув янытыл 24 ялпың мā олы, тән пуссын ўргалавет, акваг уральтавет, руц лātңыл тох лāвавет – заповедникыт, заказникыт, нила природный паркыт ос матахмат природный памятникыт.

Алексей Забозлаев акв мā урыл потыртас – Дальний Нырис Нефтеюганский районт олы.

– Ты мā тынув на-кыт уц тāра-паттыслўв. Сака нētнэ ўльпаң вор. Това ўльпат 300 тал арыг янытат олнэныл. Тāрың-лўтың йив капаит шар акв ляпат яныгмэгыт, мōт тамле мāныл тот

30% сāvит сāvнув ўльпа яныгми. Тыгыл элальтув тах мāхум тотыглаңкве патавет.

Тамле мāt туп нас ёмыгтаңкве ос пўмщалахтуңкве рōви. Наука тēла вāрнэ мāхум тув вос ёхталэгыт, мощ ёмыгтэгыт, матыр ёрнэ потрыт вос хансэгыт, туристыт ос вос мўйлэгыт, ўщлахтэгыт. Соссаң мирыт, мā-вōй нōх-винэ мāхум ос наука вāрнэ хōтпат ёт мāн вāти-хал акван-хōнтхатālэв, потрамёв. Ялпың мāt, ўргалан мāt мори ул вос хилавет, мўсхал щирыл вос уральтавет – ты мāгыс мāн пуссын аквёет ёрнэ тēла вāрёв.

«Нумто» нампа ялпың тўр мāгыс мāхум хосат тагыл воритотэгыт. Округ кўщайт ты тўр вāтатэ мощ мōтнув щирыл



пōстысаныл, руц щирыл лāваве – «зонирование парка». Экологыг рўпитан мāхум тән ётаныл ат кāсачегыт, лāвнэныл, ань ты юи-пāлт тув мā-вōй нōх-винэ мāхум ёхтэгыт, мā нōх-охтыртыяныл. Та мā сака ялпың, тот нэмат рўпата вāруңкве ат таи. Кўщай вāнын хум тох лāвыс:

– Ам палтум пищмат кāсың хōтал ёхталэгыт, пуссын ты тўр овылтыт хансэгыт – таве сака тākыщ ўргалаңкве ёри. Мāн ты рўпата ты вāрёв, таимāгыс ань ты мā йильпииг ты пōстувес.

Тўр нупыл миннэ лēңх мāн лап-пантыслўв, тув ань воссыг нэмхотыют тартуңкве ат патэв. Та ляпат олнэ соссаң хōтпат туп тән тот ёмыгтаңкве вёрмэгыт. Мā уральтаңкве тән патэгыт.

Ты этпос 23 хōталēt Белоярский ўст научный конференция вāраве, «Нумто» тўр янытлан тēла олнэтэ пāсыл 20 тāлыг ты ёмтыс. Хумус мāхум тот рўпитэгыт, мāныр потыр щёпитэгыт, ты урыл мāн тах ос акв хотты газетат хансэв.

Светлана РОМБАНДЕЕВА

Люль нак вāрнэ утыт хōнтавет

Мāньполь этпос китыт хōталēt округ Общественный палатат рўпитан хōтпат сапрāни вāрыгласыт. Сāvсыр мирыт аквёет юртыңыщ вос олсыт, люль накын ул вос хуйтвэсыт, маныр рўпата тымāгыс вāруңкве ёри, тән тот потыртасыт. Ты вāрмаль щирыл комиссия щёпитым олы. Тот кўщайг Екатерина Лоншакова рўпиты. Тав ляххал тотнэ хōтпатн ты тēла урыл потыртас.

Ань ты порат интернет хосыт люль нак вāрнэ хōтпат нас олнэ мир хōнтлуңкве кашилтыяныл. Руц лātңыл ты хōтпат террористыг лāвавет. Тән мир янытыл мāхум наскāссыг порслэгыт. Та оцмарың утыт компьютер хосыт мāхум ёт вāйхатэгыт. Овлэт элумхолас ёт нас потыртэгыт, тувыл лāпалāлым тāнки пал-

таныл вōвияныл, хōнтлуңкве хуйтыяныл.

Това мāхум тāнаныл агтэгыт, ос хōнтлуңкве мōт мāн та минэгыт. Ётыл ювле ёхтэгыт, тыт матыр овыл вāрэгыт. Ты хōтал мус сāv тамле вāрмаль ёмталас. Мāн мāvныл сāv хōтпа хōнтлуңкве мōт хōн мāн минас. Ты люль накн сāvыңпālэ мāньлат хōтпат ликмэгыт. Тāнаныл лāпалāлуңкве

кўпнитнув. Ань мāньлат хōтпат хаштāl мир олупса урыл нэматыр ат вāгыт, люль нак вāрнэ хōтпатн та агтэгыт.

Таимāгыс ань округ Общественный палатат комиссия рўпиты. Ань люль нак вāрнэ мāхум тāра-паттын мāгыс интернет акваг уральтым оныщаве. Ты накт Нижневартовский, Сургутский районыгт ос Нягань ўст ты тēла вāнэ хōтпат интернет акваг уральтыяныл.

Агит-пыгыт хуйтнэ хōтпат хōнтавет ке, тән ураныл тāра полициян лāвэгыт. Тувыл ты мāхум потраныл хансуңкве ул вос вёрмысыт, интернет

лōпсаныл лап-тōварттавет. Мōлты тал сыс интернетыт нила тамле лōпс хōнтвес ос лап-пантвес. Полицият тамле хōтпат акваг кинсавет.

Общественный палатат рўпитан мāхманув мирн ты люль нак урыл акваг потыртэгыт. Ханищтахтын мāt ос сāvсыр форумыт олыглан порат акваг ты урыл лāвэгыт. Мāхманув ўргалахтым вос олэгыт. Хаштāl хōтпатн ул вос агтэгыт. Тыгыл элаль пāvлытт ос ўсытт люль пиц вāрнэ хōтпат киснэ мāгыс интернетыт мāхум рўпитаңкве патэгыт.

Николай МЕРОВ

ХАНИЩАП

Щань латңыл пöслым кина кётэн

Ханищтап ос мәнълат хөтпат Хвармаляныл щирыл рүпитан департаментыт сапрани öлыс. Мäхум «Фронтальный диктант» нампа акция урыл тот потыртасыт. Ты тэла округ янытыл рётың юсвой этпос 21 щислат щань латың янытлан хөталт вäрыглавес.

Төнт савсыр үсыт ос павлыт öлнэ мәнщи, ханты ос ёрн мäхум «У заброшенных гнездовой» Юрий Вэлла хансум потре щирыл «диктант» хассыт. Ты акция «Родной язык – это Родина» руц латңыл намаим öлыс ос мä-вит үргалан кастыл щёпитäлвес.

Äс-угорский институты рүпитан нэ Анастасия Шиянова лäвыс, соссаң мäхум хүрум тäl сыс щань латңыл потыр хансуңкве акван-атхатыглэгыт. 2015 тälт öвыл щёс тамле тэла вäрыглавес, төнт 303 элумхöлас ёхталас. Ты тäl 544 хөтпат диктант

хансуңкве кäсашасыт. Тән мäгсыланыл 12 районыт 39 кол рүпитас. Ты коныпал мäхум Санкт-Петербург үст, Свердловский область Ивдель үст ос Германия мөт хон мät Мюнхен үст ты потыр хассыт.

Ханты нэ лäвыс, хоты павылт мäхум потыр хансуңкве акван-атхатыгласыт ос хоты мät савнув мир ёхтыс, ты вäрмаль урыл Äс-угорский институтыт интернетыт вäрим лöпсыт ловиньтаңкве рöви.

Мäхум «Фронтальный диктант» урыл маньр номсэгыт, тот öс китыглавёсыт.

Öвлэт «Югра лылыеп» нампа общественный организацият рүпитан нэ Надежда Костылева латың лäвыс. Тав ты тäl öвыл щёс ханты латңыл потыр хансуңкве ёхталас. Тувыл төва рүтанэ ос юртанэ тув ялуңкве ат вёрмысыт, рүпатаныл ат тäртвёсыт. Мөтыт тäl ты акция үщлахтын хөталт вäруңкве эри, төнт савнув мир тув тах ёхталы.

Ты тäl Юрий Вэлла хансум потре ханты ос мәнщи латңыл толмашлавес, ханты латың ёмашакв вәнэ хөтпат төва латңыт ат торгамтасаныл. Мөтыт тälт ханты, мәнщи ос ёрн мäхум тәнки щань латңыл хансым потрыт виңкве эри. Надежда Костылева лäвыс, потыр хансуңкве ёхталан мäхум пуссын вос яныглавет ос мүйлупсал вос мивет, тьи мäгсыл олн ань вöвуңкве эри. Мäхум янытлаңкве ке

патавет, тән мөтыт щёс öс тах ёхтэгыт, рүтаныл, юртаныл öс тув тах вöвияныл.

Та юи-пälт Ирина Лисютина потыртас. Ты нэ ханищтап ос мәнълат хөтпат вäрмаляныл щирыл рүпитан департаментыт соссаң мäхум отделт күщаиг öлы. Тав лäвыс, щань латың янытлан хөталэт тән вäрум акцияныл урыл ляххал тотнэ мäхум хөтал палыт потыртасыт. Ищхипың утыт ты вäрмаль урыл öс хансым öлыс. Ос кäсың тälныл савнув соссаң мäхум щань латңыл потыр хансуңкве вос ёхталэгыт, ищхипың утыт ос телевидение, радио хосыт öс акваг потыртаңкве эри.

Сапранит «Говори на родном языке» нампа касыл урыл потыр öс öлыс. Ты рүпата общественный связь, ханищтап ос мәнълат хөтпат вäрмаляныл, культура – хүрум департаментыт рүпитан мäхум щёпитэгыт. Тамле вäрмаль соссаң мäхум тәнки латңанылт вос потыртасыт, таи мäгсыл вäрвес.

Касыл рётың юсвой этпос 21 хөталэт рүпитанкве öвылтахтас. Щань латың вәнэ хөтпат такви пöслум кинатэ Ханты-Мансийск үсн вос кётытэ. Кинан тән щань латңыл ловиньтан стихыт, потрыт, эргыт вос пöслыаныл. Мäхум пöслын кинаныл вöртур этпос öвыл хөталэ мус тах пирмайтавет. Ты касылт нөх-патум хөтпат соссаң мäхум янытлан мирхал хөталэт, вöртур этпос 9 щислат, янытлаңкве патавет. Мәнщи мäхум, нанки пöслум кинан öс тув кётэн.

Людмила ТЕТКИНА



Ф.М. Лельхова, тав шурышкарский ханты латңыл ловиньтас



И.М. Молданова, тав казымский ханты латңыл ловиньтас

Ищхипың утыт вим хурил

Кит щёмьяг янытлавесыг

Ювле хульгум этпос 28 хоталэт Югорск үст «Новая весна» нампа касыл соссаң махум магсыл вәрыглавес. Югорск үс мирколт ос «Югра-Презент» нампа культура колт рупитан хотпат ты ялпың хоталн маныщи, ханты ос ёрн махум акван-атыгласаныл.

Үст өлнэ соссаң мирит тәнки пёс йис вәрмаяныл ул вос ёрувласаныл, элаль вос тотсаныл ос тәнки халаныл вос вайхатэгыт, ты магсыл щёпиталвес. Касыл ты тал овыл щёс вәрыглавес, Руковит ос Беловит тот тәнки халанылт кассыт. Үст өлнэ маныщи, ханты ос ёрн махум ты ялпың хоталт щёмьяг хумус касэг, тән пуссын сунсуңкве тув ёхталасыт.

Овлэт Нина Георгиевна Рукова ос Дарья Ивановна Белова тәнки щёмьянэн урыл потыртасыг. Тән тәнки нявраманэн ос апыгрищанэн эргыт эргункве, ййквыт ййквуңкве,

мащтырлаңкве ос щән латңыл потыртаңкве ханищтыянэн. Командаг сас сака ёмашакв эргысыг ос ййквсыг.

Тувыл тән суссылтап щёпитасыт ос тәнки катыл вәрум пормасаныл суссылтасаныл. Беловит ос Руковит савсыр тучаңыт, маныщи супыт, турлопсыт, аканит ос сав мот пормасыг тув тотыгласаныл. Пёс порат тамле пормасыг йонтункве касың маныщи нэ хасыс, ань туп това махум мащтырлэгыт. Савыңпалэ ань тувле нупыл тэланыл щар атим. Нина Георгиевна ос Дарья Ивановна мащтырлаңкве сака ёмашакв хасэг, нявраманэн ос апыг-



Н.Г. Рукова ос Д.И. Белова

рыщанэн йонсхатуңкве, сакныл хартуңкве ос ханищтэг. Тән маныщи пёс йис вәрмаянэн ат ёрувлэг ос үст өлнэ савсыр ялпың хоталыт олыглан порат акваг маныщи олупса урыл потыртэг, эргег ос ййквбег.

Ты касылн тән маныщи тәнүт тотыгласыт. Нина Георгиевна ос Дарья Ивановна тув ёхталам махум хул, вас ос нёвыль исмитыл, пи-

лың нянил тыттысанэн.

Ты касылт нөх-патум колтагыл пёрияңкве кос эрыс, тувыл махум такем ёмашакв эргысыт, ййквсыт ос культурав урыл потыртасыт, щёмьяг сас овыл местал майвесыг. Югорск үст өлнэ махумн тамле ялпың хотал сака мустыс, мотыт талт мот соссаң щёмьяг тув касуңкве тах вовыглавег.

Людмила ТЕТКИНА

Нётнэ ма-вит үргалаве



Тамле хуран уйхул магсыл солвал пинаве

Округувт ма-витэ сака нётнэ. Тыт сав ят, яңкылмат, тұрыт олэгыт ос савсыр ййвыт яныгмэгыт. Това тамле мат государство палыл үргалым оныщавет. Ань «Унторский» нампа заповедник урыл хансэгум. Тав Октябрьский районт олы.

Тот Унтор нампа яныг тұр олы. Тыммагыс ты заповедник тамле намыл ты пинвес. Ты ма-вит 1984 талт заказникыг

вәрвес. Тот витыт уйгтан товлың уит ос воруйт акваг яласэгыт. Тан элаль вос савмысыт, акваг үргалаңкве патвёсыт.

Ты ма округувн үргалым оныщавет.

Тот вораңкве, хул алыщлаңкве, машинал яласаңкве, вөр яктуңкве ос мот савсыр рупата вәруңкве щар ат рови. Та ма-вит үргалым рупитан инспекция-хотпат вәтихал ма мувылтыяныл. Найтэм ул вос ёмтыс, элумхолас тот ул вос вораяс, акваг уральтыяныл.

Тот савсыр воруи яласы. Тэп нуса тал порат хумус тән ворт олэгыт, учёный хотпат сунсэгыт, нэпакнта урыл хансэгыт. Тувыл ворт янгуит тыттын магыс нормат щёпитэгыт. Товлың уит магыс ййвыт палт асыт пасатэгыт. Учёныт касың туи,

таквсы, тэлы ос тұяг воруит ловиньтыяныл. Ты хосыт тән тара-паттэгыт, воруи савми манос мощцаг ёмты. Тот маколыңойкат, янгуит, щельщит, вонтырыт, барсукыт, нёхсыт, тұлмахыт, лэпыкыт яласэгыт.

Үргалан ма-вит тармыл выгыр нэпакн хансым ват нупыл кит савсыр товлың уй яласы. Тән халанылт тұрвой, саквалекв хурип шулши, хащтал лунт, щимщар ос мотаныт. Ты коньпал тот мёрсың хурип ййвыт, лүптат яныгмэгыт. Нас яласан пөх хотпа тув ат тартаве, тув ёхтын магыс нэпак хасылтаңкве эри.

Ты потыр инспектор нэ М.В. Трифонова кетыстэ, маныщи латңыл Николай МЕРОВ хансыстэ.

Мāньщи ос саран лāтың ханищтāгыт



5 классыт мāньщи лāтың ханищтан урок



Саран нāврамыт āргēгыт

Саранпāвыл школат 405 нāврам ханищтахтāгыт, тāн халанылт 139 мāньщит, 77 ēрныт, 13 хантыт ос тувыл сараныт ман рушит. Ты нāврамыт школат мāньщи манос саран лāтңын ханищтавет. Овыл классанылт тāн нас янас кружокыл вāравет, ос атыт классныл аквхуйпловит класс мус урок щирыл ханищтавет. Тамле уроканыл сāt сыс акв щēs олыглēгыт.

Анжелика Владимировна Петренко, школа кўчай вāның нē, лāвыс: «Овыл классыт нāврамыт щāнь лāтың ханищтанēныл мāгыс мāн «В мире родных языков» кружок вāрсўв. Мāньщи ос саран яныгнув āгитпыгыт урокт щāнь лāтңаныл ханищтāгыт. Руц нāврамыт тāнки культураныл ханищтаңкве ос вērмēгыт. Тāн мāгсыланыл «Культура народов Севера. История русской традиционной культуры» нампa урокыт щēпитавēsыт.

Мāньщи лāтңын āгитпыгыт Светлана Савельевна Мерова ханищтыянэ, саран лāтңын Наталья Александровна Сорока ос Татьяна Васильевна Кириченко. Ты нēквет хосат тāгыл школат рўпитāгыт. Щāнь лāтың ханищтан урокт тāн ēрнэ нēпак сака ат оньщēгыт. Тōва нēпаканыл ос пēsыг ēмтсыт. Мāн ēрувт

олнэ сараныт лāтңаныл моц мōт хурипа олы, «ижемскийг» лāвавет. Тāн Коми республиканыл ханищтахтын нēпакыл кēтавет. Тāн тāнки халанылт пуссын саран лāтңыл потыртāгыт.

Ос мāньщи нāврамыт щāнь лāтңаныл ань аты вāганыл. Щāнянылн-āщанылн ос ат ханищтавет. Ань таимāгыс тāнанылн лāтңув тārвитың ханищтаңкв. Ам тох номсēгум, мāньщи лāтың вāнэ мāгыс яныг пўмащипа Светлана Савельевна Мерован, Раиса Павловна Хозумован ос мōт мāхманувн лāвуңкве эри. Раиса Павловна сāv тāl ты школат рўпитас. Светлана Савельевна такви рўпататэ щирыл Ханты-Мансийскан касуңкве ос ялыс. Тāн пуссын эсгын нēпакыл мўйлуптавēsыт, нōх-патум хōтпат олныл майвēsыт.

Щāнь лāтың ханищтан щēsыт шар хот ке

вивет, ос лōль ēмты. Мāн школавт нāврамыт ГИА ос ЕГЭ вārмалитын акваг ēмащакв щēпитыянўв. Щāнь-āщаныл мāнавн ос лāvēгыт, мāн тōва предметын номтыңыщ вос ханищтыянўв. Тōнт тāн нāвраманыл элал ханищтахтуңкве тах патāгыт. Тōват таимāгыс щāнь лāтың ханищтан урокыл ат пўмщалахтāгыт».

Мāньщи ос саран лāтңыл нāврамыт хумус ханищтавет, «Югра» телекомпаният рўпитан хōтпат кина пōслысыт, мēн ос, «Лўима сēрипос» ос «Ханты ясанг» газетат рўпитан нēг, потрыт хўнтлысамēн. Светлана Савельевна урокет мāньщи маснут овылтыт потыртас. Тав нāврамыт ювле потыртаңкве акваг лāvиянэ. Сāvсыр мōйтыт, стихыт лoвиньтāгыт. Музейн тотыglyянэ, тот пēs пормасыт сунсыглым, лāтың ханищтāгыт. Ам ты āгирищитн-пыгрищитн «Юный корреспондент» урыл потыртасум. Тāнанылн мāнь потрыт хансуңкве лāvсанум.

Саран лāтың ханищтан нāврамыт уроканылт сātыт олнэ хōталыт наманэ тāрапаттысаныл. Овлēt тāн

руц лāтңыл лāvсаныл ос тувыл саран лāтңын хумус толмашлавет, тетрадкан хассаныл.

Наталья Александровна ищхипың пāрт тармыл хансыс. Масленица ялпың хōтал кастыл нāврамыт ты урыл ēрыг ēргысыт, хоровад вārсыт. Ос аква āгирищкве щāщēкватэ сāритам блиныт школан тотсанэ ос мāн пуссын ты атың нāнилт тыттувесўв.

Наталья Александровна такви урēтыл лāvыс: «Ам хус тāl тыт рўпитēгум. Нāврамыт руц ос саран лāтңыл ханищтыянум. Сārтын саран лāтың ханищтан нāврам сāv олыс, тāн экзаменпуссын ēмщакв хассыт. Ань ГИА ос ЕГЭ вārвесыг, щāнь лāтың вāнэ экзамен тот āтим, таимāгыс нāврамыт лāтңув ханищтаңкве ат кāсашēгыт. Ам палтув сāv мāнь āгирищ-пыгрищ ēхталы. Мōлты тāl сыресыр ищхипың утыл тотвесўв, сāvсыр хурил, мāнь кинал майвесўв, тыил нāврамыт сака пўмщалахтāгыт. Туп учебник-нēпаканув сака пēsыг ēмтсыт. Тāн Коми мāныл кēтыглавēsыт, ань ос олн ойтүңкв лāvвесўв».

**Тамара
МЕРОВА**

КАСНЭ ВАРМАЛЬ

Салы үрнэ махманув кассыт

Ты этпос 3-6 хоталанэт Ханты-Мансийск үст округ янытыл олнэ салы үрнэ махум магыс касыл вэрыглавес, руц щырыл тох намайлевс: «III конкурс профессионального мастерства среди оленеводов на Кубок губернатора Югры». Салы үрнэ махум халт шар мак ёр хотпа яныг нам винэ магыс Хальүс, Белоярский, Сургутский, Нижневартовский ос Ханты-Мансийский районьтныл 30 хотпа ёхталас.

Ты касыл кит тэла щырыл вэрыглавес — овыл хотал салы үрнэ махум нэпакыт ёт рупитасыт. Тән ань пуссын китыглахтын латңытыл щёпиталвэсыт — салыт хумус янмалтаңкве манос пусмалтаңкве эри, манарыл тыттуңкве, та маныр. Алпыл пэсыл хансуңкве овылтахтасыт, хоталъят юи-пэлт уц та астысыт, маттем та хассыт. Китыт хотал кассыт — салы яласасыт, лаглыл хайтсыт, тыньщаң пэхвтысыт, салың сун ұлтта поргысыт.

Ма-вит үргалан департамент кұщай хум Евгений Платонов тох лэвыс: «Салы үрнэ махманув округув янытыл сав мат касыллэгыт — Касумт, Саранпэвилт, Когалымт, Русскинская пэвилт. Ос ань ты касылув шар мот хурипа — тыт салы үрнэ тэла вәнэ хотпат касэгыт. Тән пуссын салың колт са-

лы үрим яласэгыт, салы янмалтэгыт, тот тармыл олэгыт. Тән ати спортсменыт, тән — салы үрнэ тэла сака ёмашакв вәнэ нэт-хумит. Тамле хонтхатыглапыт тән нас хунь касэгыт, тән халанылт ханищатгэгыт, тувыл уцпылнэг ёрыг ёмтэгыт».

Каснэ вэрмалы

Салыл каснэ вэрмалы — ты сака пумыщ пора. Ус махум алпыл пэсыл акван-атхатасыт. Салың махманувн 900 метра савиттем минуңкв эрыс. Каснэ магыс янас лёңх щёпитавес, элалы миным лёңх паттат илттыг ювле ёңхыгпэгыт. Тох тән лэкв вэрёгыт. Хотьют пёлпыңыщ мины, ювле молях ёхтыгпи, тав та нөх-паты.

Я-ты, ань соссаң махманув касуңкве та овылтахтасыт. Овлэт салың суныл яласасыт, та юи-



пэлт хум хотпат товтыл масхатасыт, салыянылн люлим тотвэсыт. Нэ хотпат ос лаглыл хайтсыт, тувыл пуссын тыньщаң пэхвтысыт.

Хум хотпат халт Касум пэвилныл ёхталам хум Иван Попов тав нөх-патыс. Нэт халт ос Светлана Пяк овыл места вис, тав ос Белоярский районт олы. Тән «Кубок губернатора Югры» нампа анысан хурип мүйлупсал майвэсыг, тувыл түйт тармыл яласан «Бураныл» мүйлуптавэсыг.

Нэ хотпат халт китыт места Светлана Канева вис (Касум пэвил), хурмит — Анна Ромбандеева (Саранпэвил). Ты тал нэт сака кэркамыщ кассыт, хум хотпат холыт тән салыл яласасыт, тыньщаң

пэхвтысыт, поргысыт, ань хотьютаныл хосан порыгми.

«Чемпион многоборья» номинацият Виталий Рускин тав нөх-патыс, китыт места Александр Тасьманов вис, хурмит ос Юрий Тарлин. Тән пуссын ханты хум хотпат.

Округ кұщай нэ вэнын хум Алексей Забозлаев мир нупыл ос потыртас, тав лэвыс: «Тыхотал мән татем ёмашакв мүйлэв. Салы үрнэ махманув касманыл юи-пэлт маттем та йквсыт, тән нупланыл сунсуңкве пумыщ олыс. Ты мән ань туп ёр хотпат акван-ёхтысыт, кассыт. Тән пуссын салы үрим олэгыт, салы янмалтэгыт. Касыңёмт каснэныл торыг тән халанылт





ханищтахтэгыт, матыр йильпи вәрмалы ман хаштәл тәла арталэгыт. Ты хөталыгыт мән үсувн мөт элы хөн мәныл сәв хөтпа ёхтыс, тамле пүмыщ касыл мәгыс тән пуссын пүмашипа ләтын ләвэгыт, сәлы үрнә мяхманув янытлыяныл».

«Югра лылыёп» организацият пуңкотнә нә Людмила Алферова мәнлат соссаң хөтпат овылтыт щәгтым потырас: «Ятил, тының мәнлат аги-пыгыт, ам тыхөтал ома холыт нән мәгысылын номтум сака ёмас. Нән яныгхөтпат алаты юил ёхтыянын, тән холытаныл молях яласэгын, матыр-ати кәркамыг вәрегын. Сунсән, төванын нөхпатсыт. Матъёмас нән тамле мўтраңыт, кәркамыт. Элаль ос аквтох яласән, рүпитән, касән. Нән хосытынт соссаң миранув элаль ос тах олэгыт, сәлыянув ос тах хайтыгтэгыт, элы хөталув ёмас номтыл үрилүв. Пуссын пустагыл олән! Сәлы үрнә ятил мяхуматенув, ам нәннан сака эруптыянув, янытлыянув!»

Мәнщи нэг-хумыг – Анна Дмитриевна ос Василий Владимирович Ромбандеевыг Саранпавылныл ёхталасыг.

Анна лавыс, тав ойкатэ ёт сәлы үрим Нёрт 24 тәл яласы. Василий Владимирович «Лучшие производственные показатели» номинацият китыт места вис, дипломыл майвес. Ань ёхталам сәлы үрнә хөтпат халт тав мак яныг олнэтэ, таимәгыс «Ветеран оленеводства» намыл майвес.

Каснә мяхум халт щар мән ос Леонид Сергеевич Албин нам лаввес, янытлан нәпакыл майвес. Тав мәнщи пыг, Хальүс район Лопмус павылт самын патыс.

Ты касыл вәрыглам мяхум ёрнколыт ос уральтасаныл. Тот рүпитам нэт-хумит янытлавёсыт, дипломнәпакыл майвёсыт. «Лучший чум» номинацият Хальүс район «Саранпаульская оленеводческая компания» нөх-патыс. Тән электростанциял мўлуптавёсыт. Китыт места Сургутский районт олнә хөтпатн майвес, хўрмит – Ханты-Мансийский районт олнә мяхум тән висаныл.

Округ кўщай ёт хөнтхатыгласыт

Ёрнколың мяхум овыл хөтал округ кўщай

нә Наталья Комарова ёт хөнтхатыгласыт. Тав ляльтә тән сәвсыр тәланыл, тәрвитың вәрмалыныл овылтыт потыртасыт – төва хөтпа олнә кол ат оныщи, телефон хосыт потыртан связь урыл лавсыт, вөрт төва мат связь щар атим. Төва хөтпан ищхипың ут эри, эрнә вышка вөвсыт. Катып-паттын нёвляныл, хўланыл, ләхсаныл ос пиланыл эл-тыналаңкве ат вермияныл. Ты тәла палт нётмил вөвсыт.

Кўщай нә вәңын хумитэ Геннадий Бухтин связь урыл тох лавыс: «Округувт вөрт, сәлы үрнә мяхум олнә мәнаныл, мощёртн кит яныг станцияг унттавөг, тув интернет нампа ищхипың ут вәраве. Тән тах вөрныл павлың ос үсың мән электронный почта хосыт пищма кетуаңкве вөрмөгыт, свинонәкве ос сыре-сыр электронный услуга утыт ёт рүпитаңкве вөрмөгыт тах».

Наталья Комарова тав ләтҗе элаль нётумтастэ: «Ань йис олуптастэ ёмас связь сака эри. Вөрт олнә мяхманув сәвсыр хаштәл ищхипың утыт ос вос вәганыл, тән ётаныл мән кос хунь потрамаңкве вос вөрмынувув».

Сәлың мяхманув ёт хөнтхатыглан мәгыс тув Наталья Стребкова ёхталас. Ты нә округт олнә мир тармыл патыянә, ты тәла палт пуңкототы. Тот тав ос «Союз оленеводов Югры» общественный организация палт пуңкототнә хум Степан Кечимов эрнә нәпакыт щёпитасыг, тув кәтпос пинсыг.

Ты нә тох лавыс: «Ты хөталыт ам сәлы үрнә мяхум палт яласасум, тән ётаныл вайхатасум, суссум, хумус олэгыт, китыглахтасум, матыр тәрвит оныщегыт ман ати. Тән халанылт ёр хөтпа, мўтраң хөтпа сәв олы, тамле нэт-хумит пёриясум. Мән аквёт рүпитаңкве патэв, тән танти мяхманыл ёмашакв вәганыл, анумн тох рүпитаңкве тах кўпнит. Ты щырыл акван-нётхатым мән сәв эрнә тәла вәруаңкве вөрмөв тах».

Степан Кечимов ләвме щырыл, ань округ кўщайт соссаң мир нупыл сунсуаңкве патсыт, матыр тәрвитың вәрмалы ёмтапи те, нётумталавет, таимәгыс ань кәсың тәл ущпылнэг сәв хөтпа сәлы үруаңкв кәсащаңкве патсыт.

Светлана РОМБАНДЕЕВА

МӨТ МИРЫТ ӨЛУПСА

Мирн нётнэ хотпат касылыл

Ты этпос китыт хоталэт мирн нётнэ махум халт «Лучший по профессии» нампа касыл олмыс. Тамле тэла «Комплексный центр социального обслуживания населения «Светлана» нампа колт щёпиталвес. Ты касыл магсыл профсоюзный ос общественный организацият ос танки магсыл аныл рупитан хотпат олн майласыт.

«Светлана» нампа колт кўшаиг рупитан нэ Ирина Владиславовна Божкова ты махум ялпың хоталыл янытласанэ. Тав лавыс, ты касыл тан лов талсыс вэрыглэгыт, махум кит тал сыс акв щёс акванатыгыяныл. Ос касың талныл савнув махум касуңкве касыщэгыт, ты тал сат элумхолас танки

халанылт тот касыт. Ань та колт яныгпала ос нуса тотнэ махум олныл, пормасыл, тэнутыл ос мот савсыр щирыл нётает. Кўщай нэ лавыс, ты хотпат пуссын танки рупитаныл каркамыг ос ёмашакв вэрияныл. Тананыл тый магсыл тав яныг пумащипа латың лавыс.



Өвлэт каснэ хотпат танки урыл ос рупатаныл урыл потыртасыт. Тувыл хоты сакконыт, постановленият ос распоряженият хосыт нуса тотнэ щёмьят, савалап няврамыт, кол тал хультнэ яныгпала хотпат хумус нётуңкве рови, та урыл китыглавёсыт. Тамле рупата вэрнэ махумн савсыр сакконыт ос мот эрнэ нэпакыт ловиньтаңкве ос ханищтаңкве акваг эри. Тонт савнув махумн нётуңкве тан тах вёрмёгыт. Ос ты юипалт танки урыл потыртасыт, йиквсыт, эргысыт манос стихыт ловиньтасыт, катыл вэрум утаныл мирн суссылтасыт.

Клавдия Ильинична Лукачёва, такви опарищ наме Алгадьева, ты касылн ос вёвыглавес. Тав «Светлана» нампа мирн нётнэ колт хот тал рупиты. Ты касылт овыл щёс касыс. Өвлэт тав ос такви рупататэ урыл латың лавыс. Маныщи нэ Хальёс районт Хулюмсунт павылт школа асталас. Ос ты юипалт Тюменский нефтегазовый уни-

верситетыт мирн нётнэ хотпаг ханищтахтас, руц латңыл «социальный работникыг» лававе. Ханищтахтын маныл асталме юипалт Ханты-Мансийск үсн ёхтыс ос Татьяна Степановна Гоголева палт помощникыг рупитас. Депутат-нэ палт акваг сав махум танки тарвигыт вэрмаляныл урыл пицма хассыт, товат нётмил вёвуңкве танки ёхталасыт. Акваг олнэ колыт вёвсыт, мотаныт рупата тал олым, нявраманыл элал ханищтахтуңкве кетуңкве ат вёрмысыт. Клавдия тананылн нётыс, тый магсыл «Светлана» нампа колн хунь ёхтыс, ты рупата вэрүңкве тав ёмашакв хасыс.

Мир нётнэ колт савсыр отделеният олэгыт. Маныщи нэ ос «отделение срочной социальной помощи» руц латңыл намаим мат рупиты. Тув ёхталан махумн Клавдия тэнут ос пормас мыг. Тамле нётмилыл нусаг олнэ щёмьят, кол тал хультум махум ос коланыл найн ёсым щёмьят



Насяя агитэ



Саша пыге

Варыглавёсыт

нѣтавет. Ты коньпал Клавдия сакватахтам махум савсыр коляскатыл, сувытыл ос мот пормасытыл мыг. Тувыл Ханты-Мансийск үст олнэ соссаң махум янытлаңкве юв яланты ос мүйлупсал мүйлуптыянэ. Ты тѣла тав ос «Светлана» мирн нѣтнэ кол палыл вѣри. Хум хотпат 60 тѣлэ товлын ос нѣ хотпат 55 тѣлэ товлын кастыл янытлыянэ. Клавдия Ильинична лѣви, ты рупата тавѣн вѣруңкве сака мусты. Тѣва яныгпѣла хотпат тѣнкѣныл олѣгыт, тѣи магсыл Клавдия хунь тѣн палтаныл ѣхты ос тѣнаныл янытлыянэ, тѣн пуссын хот-щѣгтѣгыт, тѣват тай нас лѣньшалтахтѣгыт.

Мѣньщи нѣ мир магсыл хансым сакконыт пуссын вѣганэ ос касыл олум порат ты урыл ѣмашакв потыртас. Тав китыглавес, нуса тотнэ щѣмья нѣтмил вѣвуңкве ке ѣхты, хумус нѣтуңкве патыянэ. Тамле щѣмья манхурип нѣтмилыл миңкве рѣви, та урыл Клавдия жюри-хотпат элы-пѣлт потыртас.

Каснэ хотпат тѣнки олупсаныл урыл ос потыртасыт, тѣва кѣтыл вѣрум ос сакныл хартум пормасаныл суссылтасыт. Клавдия «Куринька» мѣньщи ййкв ййквыс. Тав мѣньщи щѣмьят самын патыс, щѣнь лѣтѣ ѣмашакв вѣгтѣ. Щѣняге-ѣщаге нѣлолов нѣврам янмалтасыг. Клавдия шар мѣнь нѣврамыг олыс. Мѣниг олме порат, тѣн пѣвланылт Уй ййквес. Тав тув ѣтѣт ѣт ялыс. Тамле ялпың хоталт хум хотпат тѣлыглахтасыт, нѣ хотпат ос мѣнь ѣгиришит мѣньщи ййквыт ййквыс. Та порат Клавдия «Куринька» ос мот ййквыт ййквуңкве ханищтахтас. Тюмень үсн хунь минас, мот мѣньщи, ханты ос ѣрн ѣгит-пыгыт ѣт савсыр ялпың хоталытт ййквуңкве вѣвиньтѣлвес. Тѣнт та үст соссаң мѣньлат хотпат тѣнки организация вѣрыгласыт. Клавдия ос тув хасхатым олыс. Тувылт мот ѣгит-пыгыт ѣт тав акваг «Уринѣква хотал» янытлаңкве ялантас. Ты коньпал нѣпак ловиньтан об-



Клавдия мѣнь порат

ластной колт «Слово народов Севера» нампа кружок олыс. Уст олнэ соссаң махум ос мѣньщи, ханты студентыт ос акваг тув вѣвыглавѣсыт.

Ханищтахтын мѣныл ѣстуме юи-пѣлт Ханты-Мансийск үсн ѣхтыс. Татьяна Степановна Гоголева палт рупитым, тавѣн савсыр ханищтапыт, конференцият ос мот рупата вѣруңкве нѣтыс. Тѣнт тѣн «Шешкинские чтения» нампа ханищтап Лѣпмус пѣвылт вѣрыгласыг. Та пѣвылт махум щѣнь лѣтың ос мѣньщи ййквыт ханищтаңкве акваг-атыглавѣсыт. Клавдия тув ялме порат ос мѣньщи ййквыт ханищтас.

Ань ты касылт тав ос мѣньщи ййкв ййквыс,

кина суснэ тотап хосыт такви щѣмьятѣ ос руптанэ хурит суссылтас.

Мѣньщи нѣ ты үст хосат тѣгыл олы, тувыл Хулюмсунт, такви яныгмам пѣвлѣ, ат ѣрувлытѣ. Ущлахтынѣтѣ порат Саша пыге ос Настя ѣгитѣ ѣт тув яланты.

Клавдия лѣвыс, ты касылт тав нѣх ат патыс кос, ос мот махум элы-пѣлт такви рупататѣ ос мѣньщи культурав урыл ѣмашакв потыртас. Ань округ янытыл мирн нѣтнэ хотпат халт тамле касылыт акваг вѣрыглавет, тот нѣхпатум хотпат ѣлаль касуңкве Сургут үсн тах минѣгыт. «Светлана» нампа колт нѣхпатум нѣ ос тув тах мины.

**Людмила
ТЕТКИНА**



Клавдия школат ханищтахтѣме порат



Соссаң махум аһытныл савсыр утыт ёргысыт

Маһыполь ётпос хурмухуйпловит хоталныл сатхуйплов хоталё хум Ханты-Мансийск усн «Торум Маа» нампа музейн соссаң хотпанув ёрыгхатуңкве ёхталасыт. Тан тыт ат хотал аһытныл, лувныл савсыр пормасыт ёргысыт. Мащтыр хотпат Белоярский, Сургутский ос Нижневартовский районтыныл, Тобольск усныл тыг ёхталасыт.

Обыл хотал учёный хотпат доклад-нёпакыт ловиньтасыт. Пёс порат махум аһытныл манхурип пормасыт вёрсыт. Акв хонтаң маһыщи учёный ёква Дина Васильевна Герасимова ёс тув ёхталас. Тав учёный финн ойка Ууно Таави Сирелиус урыл потыртас.

Ты мот хон мат олум хум шар пёс йис порат, онтоловхуйплов нотыт, тыг ёхталас. Та порат манырсыр пормасыт аһытныл тыт соссаң махманув вёрсыт, тав нёпакн хассанё. Пуссын аквёет хурумсат савсыр пормас урыл нёпаканёт хансыглас. Ты утыт халт яныгсат налыманкем пормас махманув лувныл вёрсыт. Пёс махманув ёвт нёлыт тольханыл уй аһытыл вёрыгласаныл, тан пёл-

пыщ вос минёгыт. Тав хотхуйплов савит савсыр нёл урыл хансыглас.

Дина Васильевна диссертация вуянтаме магыс наука нёпакёт хулпаян ос воряян урыл маһыщи латһыт хансыгласанё. Финляндия мат Хельсинки ус музейт хул лувныл вёрим пормасыт касалалыс. Соссаң мирув касың воруи ос хул магыс, насати, янас нёл ёщмыт. Финн ос венгр рут махманув пуссын сака мутраһыт, тан тыг ёхталанёныл порат, пёс пормасыт ёмщакв ханищтыяныл ос танки мананылт аквтох вёрияныл.

Та музейт касың воруи ос хул алыщлан магыс янас нёлыт щёпитымат. Савыңпалё нёл тольхыт салы, янгуй аһытныл манос



салы лагыл лувныл вёрыглавёсыт. Тёва нёлыт товың уй пун ёщмыт.

Дина Васильевна ёпатё воряян ос хул алыщлан хонтаң маһыщи хотпаг олыс. Тав сёля-саквнял патронын пиннё маһы хусапыт, пистон ёщнё хусап ос мот савсыр пормасыт салы аһытныл пуссын вёрыгласанё. Салы нёрм лувныл тумран вёрыглас. Та ёнгын ут аһыт мус ёмщакв суйты.

Пёс порат махманув савсыр пормасыт лувныл вёрыгласыт. Ты апа тагатаң ваңкрип, хулуп хаснё сүпс, хул пувнё нясыт, нёлың пайп тагатаң магыс ваңкрип ос мот пормасыт. Воряян хотпат ёнтапаныл лувныл вёрим савсыр утыт тагатаһыт. Касың воряян хотпа ёнтапёт аһыттар (маколыңойка пуңк) оһытас. Тувыл салы кернё магыс пуклат ёс пуссын аһытныл вёрим олсыт. Ётнограф хотпат лавнёныл щирыл, соссаң мирув нотыт палытыл акваг пормасыт лувныл вёрыгласыт.

Ты семинарт ат мащтыр хотпат лувныл пормасыт вёрсыт.

Касың хотпа такви олупсатё урыл аһумн потыртас.

**Яков Никифорович
Тарлин**

Ты ханты хум Белоарский районныл Касум павылныл ёхталас. Мащтыр хум матыр-ати пуссын вёруңкве хасы. Уй аһытыл касай налыт, сыпалит, салы лагыл лувныл тумраныт вёри. Аһыт ёхталаме порат тав тумраныт вёрыс. Ос мощ ты рупататё урыл потыртас.

Тав лавыс, пёс порат тумран касың колт олыс. Ты ёнгын ут савыңпалё ёкват тан вёрыгласыт. Маһы нёврамыт магыс ёнгын утыг олыс. Яков маһыг олмёт, сунсыс, хумус Ксения Григорьевна Ерныхова, мащтыр ханты ёква, тумраныт вёрыс, тавёныл ты ханищтахтас. Тувыл лащал-лащал такви вёруңкве та обылтахтас. Лув облёт пайтаве, ворянё, сываранё хот вос кулатасыт. Тувыл торыл хот-сёгаве ос тославе. Ётыл ущта ёрнё щирыл ёргаве.

Аһыт хум ёмас номтыл тумран вёруңкве



С.В. Кечимов



Э.Н. Покачева



Я.Н. Тарлин



Ю.В. Баткина

ўнты ке, эт сус ловманкем вѳрункве вѳрми. Ос тумран ѳмас суил вос суйтыс, сѳв рўпата ты тѳлан мины. Тѳванакт ѳтпоскем вѳраве. Ос вѳрум тумран тѳра ѳмас суй ат мыг, тав мощ хуи, тѳнт ущ нѳтнѳ суил суйтункве паты. Тамле ты пўмаш потыр мащтыр хум потыртас.

Сергей Васильевич Кечимов

Ты ѳйка Сургутский район Русскинские пѳвил пѳхыт Имлор нампа ѳис мѳтѳт самын патыс. Ань тыг мус тот ѳлы. Хум лѳвыс, сартын, хунь мощца мѳ-вѳй винѳ хѳтпа тѳн мѳнанылт рўпитас, хѳтпанкем сѳлы ѳньщас. Ань мувлахи нефтяникыт сѳв мѳ-вѳй мѳныл нѳх-выгыт. Тав номсы, сѳлыянѳ таимѳгыс холункве патсыт, ѳис мѳтѳт газ атыл сака пасы. Вѳиң сѳлыт вѳгтѳлыг патѳгыт, ѳмыгтым нас ѳл та патыглѳгыт.

Ты накт хум пуңке вѳтихал ѳгмыңыг ѳмталы. Нефтяникыт акваг газ кон тѳратѳгыт. Тав тѳнаныл

китыгласанѳ, манрыг газ тѳратѳгыт. Тѳн ювле тох лѳвѳгыт, тамле рўпатаныл, хоталь вѳрхатѳгыт.

Тувыл ос ань лесникыт ханты хѳтпатн вѳр ѳл-яктункве ат тѳратавет. Мѳ-вѳй винѳ мѳхум тай рўпитан мѳнанылт янытѳт вѳр ѳл-яктыяныл. Аквматнакт лѳнх пѳхат пѳс мѳнь ѳнквал лўлис. Экват таве хот-сѳртсаныл. Вѳр ўргалан хѳтпат ѳхтысыт, штрафолныл пинункве ѳмталасаныл. Маткем ты вѳрмалѳ мѳгыс та лўкамтавѳсыт.

Сергей Васильевич ѳис мѳтѳт сѳлы ўрнѳ коныпал ѳнытныл сѳвсыр пормасыт мѳщтырыг ѳрги. Вѳраян хум ѳнтапыт вѳри ос мѳт сѳвсыр пормасыт. Ёхталаме порат тав ѳнтап мѳгыс пувыр лѳквыт ѳнытныл вѳрыс. Лувыт ѳрнѳ щирыл ѳргын мѳгыс ѳйв ут ѳньщи.

гнытныл пормасыт ѳргункве такви мѳньтагыл ханьщувлас. Опѳтѳ, ѳтытѳ хумус вѳр-сѳг, сунсыс, тыщир та ханищтахтас. Ёнтап янытѳт ѳстын мус сѳв хѳтал рўпитаңкве ѳри.

Таимѳгыс сѳвынпѳлѳ шаңкванѳ юн вѳрсанѳ, мощ хультыс ос тыг ѳстлан мѳгыс тотыстѳ. Ёис мѳтѳт ѳлнѳтѳ порат, хотьют ѳнтап вѳви, тавѳн та вѳри, рўпаттѳл нѳмхуньт ат унлы. Вѳрум ѳнтапанѳ ѳл ат тыналыянѳ, нас тох мўйлуптыянѳ. Тамле ты нѳмса мѳщтыр хѳтпаке ѳхталас.

Юлия Васильевна Баткина

Нѳ ѳс ѳнытныл сѳвсыр пормасыт яктункве тыг ѳхталас. Тав ѳтытѳ Василий Григорьевич ханты хум, Хѳльўс район Соусланы пѳвилныл ѳлы. Ань та пѳвил ѳтим. Юлия мѳниг ѳлмѳт нѳтнѳ хурит кѳтыл пѳслыс ос ѳрыгхатас. Школат ты вѳрмалѳ кѳсалавес ос нѳврам художественный школан ханищтахтункве кѳтвес. Тот ханищтахтын мѳныл ѳстыс ос лувыл сѳвсыр пормасыт яктын фабрикан рўпитаңкве минас.

Та фабрикат рўпитыматѳ, сѳвсыр хурит яктункве ты ханищтахтас. Тав тамле мѳщтырлан семинарн ѳвил щѳс ѳхтыс. Тыт

ўй ѳнытныл пувыр лѳкв вѳрыс. Тамле лѳквын пѳс порат сосаң нѳквет юнсхатнѳ тѳныт сѳсумтѳлсыт. гнытныл вѳрнѳ хуриянѳ хорамың хансал щуртыянѳ. Ты рўпата тавѳн сака мўсты.

Ты коныпал тот Вячеслав Юрьевич Кондин, «Тѳрум Маа» музейт рўпитан хум, сѳлы нѳрм лувыл касай вѳрыс. Тав лѳвыс, тамле касайл хўл сѳмнилюнкве сака кўстыр ос молях. Тувыл Данил Николаевич Покачев Сургутский район Сортым пѳвилныл ѳхталас. Тав ѳис мѳтѳт такви сѳлыянѳ ѳньщиянѳ. Тыт салы пѳснѳ сув ос сѳлы кѳрнѳ квѳлгыт вѳрыс. Ос Эльвира Никитовна Покачева тав экватѳ ѳгит юнтуп тўщтын утыт юнтункве ханищтасанѳ.

Мѳщтыр хѳтпат Ханты-Мансийск ўст ат хѳтал ѳрыгхатасыт ос мѳщтырласыт. Пуссын вѳрум утаныл музейн хультуптасаныл. Ты рўпатаныл мѳгыс кѳсың хѳтпа янытлавес.

**Николай
МЕРОВ**

МОТ МИРЫТ ОЛУПСА

Пыг так номтыл элаль олы



Рётың юсвой этпост «Хотал» нампа Ас-угорский театр ос акв йильпи спектакль суссылтас, ты «Калека с острова Инишмаан» намаим олы ос тав ирландец хум

Мартин Макдонах потре щирыл вәрвес. Мән театрувт тав Анна-Ксения Вишневская режиссёр-нэн щёпитавес. Тувыл ёнгил ёмщакв вәрнэ магыс «Доступная среда в Югре на 2016-2020 годы» намаим программа щирыл нётвес.

Ты спектаклит агмың-мо-сың пыг олупсатэ овылтыт потыртэгыт. Наме Билли, тав агмың няврамыг самын патыс, ләглагётыл нөхыс. Таитэ паттат мэхумн намталавес, тавётыл мовиньтасыт. Щәнягён-әшагён тав ат янмалтавес, кит акаваге палт яныгмас. Янгыг ёмтме мус тав

такви щәняге-әшаге хонтункве таңхыс, ос акв щёс тұлмахыл такви оlnэ пәвлёныл мот мән ояс. Тав номсыс, та мят мощ сымыңнув хотпат олэгыт.

Театрыт рүпитан хотпат ёт ты спектаклит Ханты-Мансийск үст оlnэ мәнлат пыг ёнгуңкве вөввес. Наме Александр Дмитриев, аквхуйпловит классыт ха-нищтақты. Пыг ләглагётыл ворил ёмыгыт. Хансым потрыт тавён ань ты кос тәрвит хунтлуңкве олыс, ос тав ёмщакв ёнгыс. Ам таи ләвёгум, тав Билли пыг хольт аквтох так номтыл элаль олы.

Тамара МЕРОВА

Йильпи тинат та суссылтавёсыт

Касың тәл Ханты-Мансийск үст тина суссылтан фестиваль вәрыглаве. Ань ты тәл атхуйпловит щёс тав минас. Сәв яныг артист-мэхум, тина вәрнэ мэхум үхувн ёхталасыт.

Овыл хоталт тән «Югра-Классик» кол тив-рын шалтнэ элы-пәлт выгыр төрыл нортим лёх хосыт ёмсыт, рущ ләтңыл ләваве – «красная дорожка». Ёст оlnэ мэхум ты урыл вәгыт, мощ сартыннув тув ёхтэгыт, кон та үрхатэгыт. Артист мэхум хунь тән ляпанылт ёмёгыт, тән матыр тәнанылн лягалэгыт, пөслыяныл.

Ты тәл мот хон мәнныл мүй мэхум тыг вө-

выглавёсыт – Индия, Чехия ос Китай маныл. Щар сәв хотпа Китайныл ёхталасыт. Ты фестиваль овыл хоталёт мүй мэхум элы-пәлт щар мак яныг спортсмен хотпа такви маныр хасы, таи суссылтас. Тав наме Ши Янтюн, кунг-фу каснэ мят тох ләваве – мастер кунг-фу в 34 поколений. Тав аквтуп лув щар ат оньщи, тув мустыгле-тувле сәвсыр щирыл хұтыглахтуңкв вәрми.



Тав атхатам мирн тамле ёмас ләтың ләвыс: «Мән оlnэ мавт китай-мэхманув халт лав нёгылттан щар акв хотпа атим. Мән мәнйтагыл ханищтавёв — люль ләтың ләвуңкве манос нэпакт хансуңкве мәннавн щар ат рөви. Таимәгыс ты мән сәвсыр касылн ялантэв, алхатуңкв ёмщакв ханищтахтэв. Нявраманув ос мән тәгыл ты вармальн ханищтавет, тән кантыңыг ул вос яныгмёгыт».

Ты фестивальт 173 сәвсыр тина суссылтавес, ты тинат 25 мот хон мәнныл тыг тотыг-

лавёсыт. Мак ёмас тинат наманыл юи-оьыл хоталт мирн ләввёсыт. Ты кинофестивальт сәвсыр мүйлупса миве. Щар яныг мүйлупса рущ ләтңыл ләваве – «Золотая тайга». Ты тәл «Алмазный остров» нампа тина вәрум мэхумн майвес. Титыг мүйлупсал «Серебряная тайга» — «Последняя семья» тина пөслум мэхум янытлавёсыт.

Хұрмит мүйлупса «Бронзовая тайга» — «В последние дни города» нампа тинан мүйлуптавес.

Валентина ВАСИЛЬЕВА



Китайныл ёхталам хотпат

Мәщтыр Эква пормасанэ акван-атыглавёсыт

Ханты Эква Агафья Александровна Волдина катыл вәрыглам пормасанэ Ханты-Мансийск үст «Төрүм Маа» музей колт суссылтавёсыт. Ты хонтхатыглап тох намайлевес: «Душа творит руками...» 1998 тәлт тав «Народный мастер России» намыл майвес.

Ты мәщтыр Эква өлме палыт сәвсыр ху-сапсовыт сәсныл юнтыглас, хорамыл шуртсанэ. Пәквпалың супыт юнтыс, салы котыл лагыл маснут юнтыглас, сакныл матыр хартыс. Сәвсыр пормас, маснут тав та вәруңкве хәсыс, мәщтырлаңкве хәсыс, акваг матыр щаквщис.

Музей күщай ваңын нэ Эрика Петровна Сургутскова ләвме щирыл, Агафья Александровна сака пұмыщ пормасыт

вәрыс — мә-вит, вөр, ййвыт ос үйхулыт хурияныл пуссын тот олэгыт, нәңкэгыт. Тән выставкатын ос сәвсыр конкурсытын тотыглавёсыт, мирн суссылтавёсыт. Агафья Александровна дипломытыл ос янытлан нэ пакытыл акваг майлувес. Тав вәрум пормасанэ «Төрүм Маа» музей коны-пал Россия янытыл сәв мāt олэгыт. Эрика Петровна Эква өвылтыт сәв ёмас



сымың ләтың ләвыс. Тувыл ты мәщтыр Эква агитэ **Галина Семёновна Волдина** потыртас:

— Ам омам 1934 тәлт Октябрьский район Моим пәвылт самын патыс. Яныг хонт порат омам пұрка юнтыс, та порат тав сәт тәлэ ущ төвлыс. Тувыл элаль акваг матыр юнтуңкве та патыс. Мәнь тагыл атятэ юи-пәлт хайтыгтас, тав этэ хұлуп сунсуңкве, пил вәтуңкве ялантас. Ома тэ юнсхатуңкве үнты, тав ляпатән үнтылматы, сунсы, хумус тав юнты, щаквщис. Тох ләщал-ләщал та ханищтахтас.

Хунь сыре-сыр фестивалит квәлтапаптувёсыт, ам омам ну-пыл ләвөгум: «Наң тасәвит пормас катыл вәрсин, төваныл акв хотты суссылтапын тотыглыянамен. Мәхум вос сунсэгыт, ань ханты нэ хөтпанув маныр вәруңкв хәсэгыт, вос пұм-щалахтэгыт». Омам кәсәсас, тувыл тав вәрум пормасанэ хөт-әти тотыглаңкве патвёсыт,

омам вәңкве патвес, намың-суиңыг ёмтыс. Мәхум тавән ханты супыт юнтылтасыт. Яныгмамум порат тав аномн ханты супыт юнтыс, пұркат юнтыс. Омам эргуңкве хәсыс, ханты эрыг сәв вәс. Тав яныг щёмьят самын патыс, анёквәм аги өпарищ наме Обатина олыс.

Ань ты музей суссылтапын това пормасыт Галина Семёновна Октябрьский пәвылт өлнэ музейно-выставочный центрыныл тотыс. Төват «Культура» намба Творческий объединение колныл вуйвёсыт, матахмат пормас ос «Төрүм Маа» музейт өньщавет. Ты мәщтыр Эква молты атимыг ёмтыс. Тав тәлатэ Галина Семёновна агитән элаль тотаве. Ома тэ хольт тав ань ос матыр юнты, сәвсыр суссылтапытын яланты, катыл вәрнэ пормасанэ мирн суссылтыянэ.

Светлана МАТВЕЕВА



СОССАҢ МИР КУЛЬТУРА

Ўсың мәт яныгман этпос пурлавес

Пёс порат ханты махум тэлы-түяг этпос яныгман порат пурлахтын кан вэрыгласыт, этпос пурлысыт. Этпалаг сатапан темт щёпитахтэгыт, акван-атхатэгыт, кон тэнэ пасан вэрэгыт, пурлахтэгыт.

Ань сат тэлыг ты ёмтыс, тыт округув янытыл ос тамле пурлахтын каныт вэрыглаңкве патвёсыт. Овлэт Белоярский районт тот тамле вэрмалъ овылтавес. Ос тыт Ханты-Мансийск үст «Торум Маа» музейт «Тылащ пори» 2011 тал пасныл вэрыглаңкве патсыт. Та пасыл ань касың түя музей кант сав махум атхатыглэгыт.

Ты түя маньполь этпос хурмит хоталт этпалаг няврамыт оманьл, атяныл, анёкваньл, щашёкваньл ёт тув ёхталасыт. Овлэт няврамыт савсыр щирьл ёнгалтавёсыт, ёвтыл нял пахвтысыт, мань сунсовыт ұлтта поргысыт. Ампың махум ёхталасыт, ампаньл сунын терим олсыт, касащан хотпат ампың суныл яласаңкве вермысыт.

Ос хот щёс порат ялпың хоталаныл та овылтавес. Музейт кущаиг рупитан нэ Э.П. Сургутскова ёхтум мүй махмыт ёт пащалахтас, касыңн ёмас олнэ латың лавыс. «Лылың союм» колт ханищтахтын пыгыт хум ййкв ййквсыт, агит нэ ййкв.

Ас-угорский театрыт рупитан артистыт акв хум, акв нэ ос агирищкве, тан ёрттам щёмья, нэглысыт, ёмантэгыт, халанылт потыртэгыт, агирищкве омаге-атяге титыглы, манрыг этпос овлэт мань ломтэ нэглы, тувыл касың хотал яныгнув та ёмты ос этпос сыс шар яныг та яныгми. Тох потрамм ёмантэгыт, анёкватэ палт ёхтэгыт, тот агирищкве анёкватэн этпос урыл потыртаве ос та юипалт тан пуссын сып нонхаль пурлахтуңкве та минэгыт.

Тот туйтныл яныг пасан щёпитым олы. Яныг махум пасан вэрэгыт, Тимофей Алексеевич Молданов ханты латңыл пойкщи, элалъ олнэ посың хотал, элалъ олнэ нотың хотал Торумныл вёви. Ман, соссаң махум, хотют касащи, юил матыр тэнут тотэв, тот пасанын ұнттыанўв.

Түяг малтып хоталыг ёмты, хоталыт хосаг ёмтэгыт, савсыр уйхулыт нёх-квалапёгыт, товлың уит каркамыг тыгле-тувле исгашлэгыт. Элумхолас таимэгыс тамле порат пурлахты, тах савнув уйхул вос



Пыгыт ййквёгыт



Р.В. Меров, Е.С. Казакова, М.С. Мерова

Р.М. Гаврильчик
Таня агитэ ёт

яныгми, хулыт янувт вос савмёгыт, ворт савсыр пил вос тэлы, уйхулытын вос товлы ос элумхоласын вос товлы.

Пурлахтын хотал элы-палт нэ хотпат музейт няньныл уйхул хурит, хул хурит вэрыт, тамле нянит тослысыт. Тананыл тувыл пурлахтын пасанын ұнтавет, тот маниг яктавет, мүй махум вос тэгыт.

Ты тал музейн сав мир ёхталасыт, мот хон маньл ёхталам мүй хотпат ос тув тотыглавёсыт, тананылн тот сака пумыщ олыс. Пуссын аквьёт хурумсат атпан арыгтем хотпа тув ёхталас, ань ўсың махум ос ты ялпың хотал урияныл, тув муйлуңкве ялапалэгыт.

**Галина
КОНДИНА**

Лўимә сәрипос

(Северная заря)
№6 (1144), 23.03.2017

Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Главный редактор –
Решетникова Р.Г.
Телефон (3467) 33-36-82

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Уэль В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52

Е-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, д. 14.

Подписано в печать:
по графику 23.03.2017 г.
в 9.00.; фактически
23.03.2017 г. в 9.00.
Индексы **04399, 54399**

Тираж **1750** экз.

Заказ **156**

Цена свободная
Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной
службы по надзору в сфере
связи, информационных
технологий и массовых
коммуникаций по Тюменской
области, ХМАО-Югре и
ЯНАО.

Свидетельство о регистрации
ПИ №ТУ
72-00795 от 23 января 2013г.